

Smparu qmita knkilan nkiya

Smkuxul mkkxa nkiya bbuyu ddgiyaq ka sjiqan sayang. Rngaw ka tama rudan, “Klaun su hug? Niqan kingal elug sbiyaw, ida klaun bi ana ima, sdalih nniqan rudan ta alang Truku ka hiya wah!”msa. Qmbahang ku do mqaras ku bi lmutuc smiling tama rudan, “Rngagi ku ga inu hug? Mkmusa ku qmita hiya uri wa!”msa ku smiyuk. Rngagay su han, “ Neng-kaw yuey-ring ku-taw ” ksun dha. Ga daya hraan hidaw Nan-tow, ida tuqir emptsamac Seejiq ka elug nii. Elug sbiyaw nii ga qmangar mtaring mtudu Dgiyaq Rqda, Dgiyaq Klbiyun, Dgiyaq Paru Nan-hwa ni Dgiyaq Qahur, ssaan tmsamac tnealang Buarung ka hiya, ida dupan nSediq Toda ni nSeejiq Truku ka hiya.

Sayang dga, elug sbiyaw nii ga ida “Elug sqlahang qnawal” uri da, Cung-tung Cyang-kung sbiyaw ga, iyux pgkla sjiqan pskraya bnrahan uuda hhaduc deynki hraan hidaw ni gqian hidaw hiya, kiya ni gmrabang balay matas “ Kwang-pey pa- pyaw, ri-po min-seng” maspac babaw tasil paru nii. Ga phyugan ayus nyusan Hwa-reyn ni Nan-tow hiya.

Yaasa niqan bi dungus na ka elug sbiyaw nii, bgurah mtasaw sbghulan bgihur uri. Tduwa qmita qqhuni qulic, harung balay, harung trabus, Tqilung dnii…uri. Saw bi gisu Ibuun ida nkiya ni saw ptrmaan rnaaw bbuyu, kiya ni kngkingal hngkawas o ida hbaraw ka empdrigaw meiyah qmita ni mkkxa elug sbiyaw nii. Elug sbiyaw nii ga niqan brihan saan mkkxa, kiya ni pusu mklawa ga wada na pryuxun elug qqahan hakaw ka elug sbiyaw da.

Duri ni mquri gqian hidaw na “Neng-kaw yuey-ring pu-taw” o klaun bi empdrigaw dgiyaq klealang, niqan bi hangan niya. “Teyn-c san-cwang” o wada bqanan “Rima pngrah snluan sapah” hangan ksun, ida elug ssaan sttu Klbiyun, Nan-hwa, Rqda An-tung na pusu tqian.

Kiya ka kiya ni gisu mduuy lnglingay hini tnealang seejiq o, smulu bi empdrigaw ddgiyaq, qlahang bi iya hcii ana manu ka ddgiyaq, psprui bi ka ssamac ga mniq hini ni hmnru nanaq ida nkiya, kika tduwa psllutuc ana bitaq knuwan ka ida nkiya bbuyu ddgiyaq ni lnglingay.

115 年全國語文競賽臺灣原住民族語言朗讀文章 【德鹿谷賽德克語（原稱：德路固語）】 高中學生組 編號 4 號

尊重自然生態

現代人熱愛爬山崇尚自然，阿公說：「能高越嶺古道，無人不知無人不曉，靠近德鹿谷部落祖先居住的地方」我問阿公：在哪？我好想去看。古道橫跨能高山、奇萊山、南華大山及喀囉山，這是廬山、都達、德鹿谷部落獵人狩獵的地方。

「能高越嶺國家步道西段」頗負盛名，「天池山莊」是攀奇萊南華、能高安東軍路線的重要住宿場所。擁有這片環境的族人，希望登山客能更注意山林準則，尊重野生動植物、保持環境原有風貌，永續山林生態及環境。